

## সর্বকালের শ্রেষ্ঠ বাঙালী-দ্বিতীয় স্থানে রবীন্দ্রনাথ প্রথম বঙ্গবন্ধু

স্টাফ রিপোর্টার ॥ বিবিসি বাংলা বিভাগের শ্রোতা জরিপে সর্বকালের শ্রেষ্ঠ বাঙালী হিসাবে নির্বাচিত হয়েছেন স্বাধীন বাংলাদেশের স্থপতি বঙ্গবন্ধু শেখ মুজিবুর রহমান। যাঁর নেতৃত্বে বিশ্ব মানচিত্রের নতুন দেশ হিসাবে ঠাঁই পেয়েছে বাংলাদেশের নাম। বাঙালী জাতিকে তিনি দিয়েছেন নতুন ঠিকানা। সেই মহান দেশনায়কের নাম আজ পহেলা বৈশাখের শুভদিনে বিবিসি ঘোষণা করবে। এর আগে আরও ১৯ শ্রেষ্ঠ বাঙালীর নাম পর্যায়ক্রমে ঘোষণা করা হয়। মঙ্গলবার ঘোষণা করা হয়েছে শীর্ষ দ্বিতীয় স্থান অধিকারীর নাম। এই তালিকায় এসেছে বিশ্বকবি রবীন্দ্রনাথ ঠাকুরের নাম। তবে দ্বিতীয় স্থানে ঘোষণা করার আগে কে থাকছেন শীর্ষতম স্থানে তা নিয়ে গভীর আগ্রহ ছিল সকলের মনে। কেউ কেউ ভেবেছিলেন হয়ত রবীন্দ্রনাথ ঠাকুর শ্রেষ্ঠ বাঙালী হবেন। কিন্তু তাঁর নামটি দ্বিতীয় স্থানে চলে আসায় এখন সর্বকালের শ্রেষ্ঠ বাঙালী হচ্ছেন বঙ্গবন্ধু শেখ মুজিবুর রহমান।

এদিকে বিবিসি রেডিও'র বাংলা বিভাগের শ্রোতাদের মনোনীত শীর্ষ বিশ বাঙালীর তালিকায় দ্বিতীয় স্থানে এসেছেন এমন এক ব্যক্তি যিনি আধুনিক বাঙালী সমাজ গঠনে অসামান্য অতুলনীয় অবদান রেখেছেন। রবীন্দ্রনাথ ঠাকুর, যাকে অনেকেই বাঙালীর অস্তিত্বের শেকড় হিসাবে বর্ণনা করেন। এটা নিঃসন্দেহে বলা যায় যে, বাঙালী সমাজে রবীন্দ্রনাথের প্রভাব শুধু ভাষা সাহিত্য-সংস্কৃতিতেই সীমাবদ্ধ নেই। রবীন্দ্রনাথ ঠাকুরকে কেন শ্রেষ্ঠ বাঙালীর তালিকায় মনোনীত করেছেন সে বিষয়ে ঢাকা থেকে এজেডএম আবদুল আলীম বলেছেন, রবীন্দ্রনাথকে বাদ দিয়ে বাঙালী জীবনের কোন দিকের কথা কি ভাবা যায়? গান, সাহিত্য, সমাজ চেতনা, স্বদেশভাবনা, শিক্ষা— এক কথায় ব্যক্তি বা সমাজ জীবনের যতরকম দিক আছে রবীন্দ্রনাথ ঠাকুর সবই সমৃদ্ধ করেছেন। তাঁর গান আমাদের মুক্তিযুদ্ধে প্রেরণা যুগিয়েছে, আমাদের জাতীয় সঙ্গীত তাঁর লেখা এসব তো আছেই। তিনি নোবেল পুরস্কার পেয়েছেন। সব মিলিয়ে রবীন্দ্রনাথকে আমি পৃথিবীর শ্রেষ্ঠ মানুষদের মধ্যে একজন মনে করি। বাঙালীর জীবনের সর্বত্র তিনি চিরকাল বিরাজমান আছেন এবং থাকবেন।

ব্রিটেনের লুটন শহরের বাসিন্দা গোলাম মোস্তফা বললেন, গীতাঞ্জলি দিয়ে তিনি নোবেল পুরস্কার পেয়েছেন। এটা আমাদের বাংলা ভাষার জন্য গর্ব, আমাদের বাঙালীর জন্য গর্ব। তিনি হিন্দু, মুসলিম, খ্রীষ্টান সবার কবি, বিশ্বকবি। তাঁর কবিতাগুলো পড়লে মনে হয় তিনি আজও জীবিত আছেন। ‘সাত কোটি সন্তানের মুগ্ধ জননী, রেখেছো বাঙালী করে মানুষ করনি’— তিনি কতদিন আগেই এই কবিতা লিখেছেন। অথচ তাঁর এই কবিতা আজও বাস্তব। এখনও আমরা মানুষ হইনি।

পশ্চিমবঙ্গ থেকে বিশ্বনাথ মণ্ডল বললেন, রবীন্দ্রনাথ ঠাকুর তাঁর কবিতা, গান, উপন্যাস, নাটক ও সঙ্গীত রচনার মাধ্যমে বাংলা সাহিত্যকে যতটা বিশ্ববাসীর সামনে উপস্থাপন করেছেন আর কোন কবি ও লেখক তাঁর ধারেকাছেও পৌঁছতে পারেননি। রবীন্দ্রনাথ ঠাকুর সেই পুরুষ, যিনি সর্বতোভাবে বাংলাকে আধুনিক করেছেন এবং বাংলার মননকে জাগ্রত করেছেন।